

Sto Sontgaclau star uonn si Crap Ner?

Las uniuns responsablas per la fiasta da Sontgaclau han stuiu elavurar in program alternativ

DA CARMEN MONN/FMR

■ Cun creativad ed engaschi han las uniuns da giuventetgna da Sedrun e Breil, sco era l'Uniun da sport e cultura Cumpadials, anflau soluziuns individualas pil di da Sontgaclau. La vischnaunca da Laax ha perencunter stuiu decider da schar curdar per uonn la viseta usitada dil sogn. Quellas mesiras ein necessarias cunquai ch'il coronavirus ei aunc adina fetg presents en nies miez. Igl usit da Sontgaclau ei en bia vitgs fetg semegliants. Il sogn e ses gidonters s'entaupan l'emprema fin d'jamna da december e vegnan smincai e vestgi tenor tradiziun. Els ein presents alla devoziun en baselgia e silsuenter fan els ina viseta als convischins en lur casadas. Per la finiziun digl usit serimna l'uniun en in'ustria dil vitg per tschenar e star da cumpignia. En bia loghens ein las uniuns da giuventetgna responsablas per quei usit. Sco ina retschera dalla FMR muossa, eis ei necessari d'improvisar uonn.

Impurtonza pils vitgs

«Nus savein buca schar curdar quella fiasta dil tut», manegia *Maurin Cavegn*. El ei president dall'Uniun da giuventetgna Sedrun ed ei pertscharts dall'impurtonza da quei usit. Els hagian stuiu far ponderaziuns ed encurir alternativas. Cunquai ch'igl ei lubiu da celebrar messas, vegn il Sontgaclau ad esser presents ad ina devoziun la sonda sera. Per ch'els affons sappien tuttina haver plascher d'in scarnuz emplenius cun bienas, han els



Ils Sontgaclus da Breil cun lur gidonters.

FOTO GIANLUCA VINCENZ

priu in exempel dils vischins dad Andermatt. Leu astgan ils affons deponer lur giavischs en scaffa da brevs e cura ch'ei fa stgir vegn il Sontgaclau e metta per mintga brev in satget lien.

Era ils affons da Breil san selegrar d'in pign present dil sogn. Tenor il president dall'Uniun da giuventetgna Breil, *Gianluca Vincenz*, han els elegiu in auter liug che usitau per la sentupada. Probabel

vegn ei ad esser en caplutta ni giuado sin in plaz. Las famiglias ston s'annunziar ordavon tier l'uniun, per ch'els sappien parter en il temps. Mintga famiglia vegn persula en quei liug e sa tedlar, tgei ch'il da barba liunga ha da raquintar. En cass da bia annunziass vegness ei era decidiu dus loghens da s'entupada.

Enzatgei semegliant ha era la suprazionza dall'Uniun da sport e cultura

Cumpadials ponderau. Siu Sontgaclau e ses gidonters, Sabbadeus ed igl aungel, vegnan uonn buc a far visetas ellas casadas. Sch'ina famiglia lessi denton buca desister d'ina paterlada cul sogn, dessi ei senz'auter in'alternativa, di *Alexa Fry*. Il Sontgaclau fuss lu giuado ni en ina gronda stanza, sco per exempel ella scola dil vitg. «Cunquai ch'il diember d'affons el vitg ei pigns, sai jeu buca sch'ei vegn in-

summa a dar annunziass», di la presidenta. Per quei hagian els era aunc buca ponderau dapli detagls.

Capientscha per la decisiun

Ils commembers dall'Uniun da sport e cultura Cumpadials hagian reagau cun capientscha silla situaziun extraordinaria. Naturalmein seigi quei donn, mo negin lessi riscar enzatgei, di Fry. Las duas uniuns da giuventetgna da Sedrun e Breil vegnan ad informar lur commembers ils proxims dis e discuorer davart plans concrets. Il pli impurtant eis ei da saver mantener la tradiziun da Sontgaclau, igl aspect finanziar ei secundars. «Nus fagein, sche insomma, in fetg pign gudogn culla sera da Sontgaclau», menziunescha *Maurin Cavegn*. Era dils auters audan ins zatgei semegliant. *Gianluca Vincenz* di, ch'els seigien buca dependents da quels daners. Ed era la giuvna da Cumpadials di ch'els fagevien entochen ussa buca via diuns cun las bunamas da Sontgaclau.

Negin Sontgaclau a Laax

La suprazionza communal da Laax ha decidiu da desister uonn d'ina fiasta da Sontgaclau. Il menader dall'administraziun communal, *Orlando Derungs*, di sin damonda dalla FMR, ch'ei fussi buca stau responsabel d'organisar la viseta da Sontgaclau sco usitau. Era a Laax fuss l'uniun da giuventetgna stada responsabla per quei usit. Aschia sco la situaziun actuala vesa ora, astga il Sontgaclau era pachetar uonn il sacados, prender a bratsch ses gidonters e semetter sin via giu da Crap Ner.

reclama

Clever: So angeln Sie sich CHF 400.–

Zusatzversicherungen wählen
und Geld auf Ihr Konto erhalten.

kpt: die krankenkasse
mit dem plus

[kpt.ch/jetzt](https://www.kpt.ch/jetzt)